



Pele Broberg  
Inatsisartunut ilaasortaq  
Naleraq  
[inatsisartut@inatsisartut.gl](mailto:inatsisartut@inatsisartut.gl)

**Kangerlussuarmi Air Greenlandimi sulisut pillugit § 37 naapertorlugu  
apeqquteqaammut 2023-042-mut akissut**

01-11-2023  
Suliap nr.: 2023 - 6355  
ID nr. 89460894

Asasara Pele Broberg,

Inatsisartut suleriaasianni § 37 naapertorlugu Kangerlussuarmi Air Greenlandimi sulisut pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909  
3900 Nuuk  
Tlf.: (+299) 34 50 00  
E-mail: [box909@nanoq.gl](mailto:box909@nanoq.gl)  
[www.naalakkersuisut.gl](http://www.naalakkersuisut.gl)

**Apeqqut 1: Ilumoorpa Air Greenland A/S Kangerlussuarmi sulisuni  
ataatsimeeqatigisimagaat, qanoq kinguneqassanersoq, Nuummi Ilulissanilu  
mittarfissuit piareerpata, Kangerlussuarmilu Air Greenland A/S  
sulisoqarnissaanut qanoq kinguneqassanersoq?**

Akissut: Akissuteqarnissamut Naalakkersuisut Siulittaasuata Naalakkersuisoqarfianit akissut una pissarsiarineqarpoq:

"Aap".

**Apeqqut 2: Nuummi aammalu Ilulissani mittarfiit ammarpata Kangerlussuarmi Air  
Greenland A/S-ip suliffiutaasa amerlassusaasa allannngornissaat pillugit  
Naalakkersuisut piumaffigissavagut paasissutissat suut pigineraat  
nassuiaqqullugu. Akissut: Akissuteqarnissamut Naalakkersuisut Siulittaasuata  
Naalakkersuisoqarfianit akissut una pissarsiarineqarpoq:**

Akissut: Akissuteqarnissamut Naalakkersuisut Siulittaasuata Naalakkersuisoqarfianit akissut una pissarsiarineqarpoq:

*"Nuummi Ilulissanilu mittarfiit ammarnerisa kingorna Air Greenlandi Kangerlussuarmi qassinik sulisoqarnissaani, Kangerlussuarmi siunissami qanoq suliartoqartigissanersoq apeqqutaassaaq. Tamanna suli ilisimaneqanngilaq. Sulisut ataavartumik paasissutissinneqarluartarnissaasa qulakkeerneqarnissaa siunertarlugu, 2022-p ukiaaniilli qaammatit pingasukkaarlugit Air Greenlandip Kangerlussuarmi sulisut ataatsimeeqatigisarpai."*

**Apeqqut 3: Naalakkersuisut Aningaasaqarnermut Ataatsimiititaliamut  
qinnuteqarpoq ukiumut Mittarfeqarfiit A/S 105mio tapiissutisarnissaanut, ukiuni 30  
tulliuttuni qanoq ajorseriaataatigissava pilersaarutigisamiinngaanniit?**

Akissut: Aningaasanut Inatsimmi konto pingaarneq 72.26.04 kiisalu tapiissutissat amerlassusissaat pillugit Aningaasaqarnermut Akileraartarnermullu Ataatsimiititaliap

suliaq 01.31.06/01009 pillugu aalajangiinera inussiarnersumik innersuussutigaakka. Tassunga aamma Mittarfeqarfiit A/S pillugu Inatsisartut inatsisaat nr. 19, 21. november 2022-meersoq innersuussutigisinnaavara.

Mittarfeqarfiit A/S-ip ukiuni qulini atuuttussamik kiffartuussinissamik isumaqatigiissusiorfigineqarnissaannut, Inatsisartut Naalackersuisut isumaqatiginninniarsinnaatinnikuuat. Taamaattumik ukiunut 30-nut iluarsuuteqartoqassaguni eqqornaviangillat, § 37-lu naapertorlugu apeqquteqaatip akinissaani sinaakkutaasut iluini tamanna akisinnaangilara, apeqqutimmi akinissaannut isumalluutit annertuut atorineqassammata, tak. Inatsisartut suleriaasiat, § 37-imi imm. 2.

**Apeqqut 4: Eqqorpa Naalackersuisut ukiumut 105mio Mittarfeqarfiit A/S kiffartuussinissamut isumaqatigiissummut aningaasaliinissamut, ilaatingikkaat ukiumut 53mio Kangerlussuup aningaasalersornissanut?**

Akissut: Kisitsit taaneqartoq Mittarfeqarfiit A/S-imut ingerlatsinissamik isumaqatigiissutaasumi (31-3-23-mi atsiorneqartumi) atuuttumi takuneqarsinnaangilaq, paasissutissalli annertunerusut *"Mittarfeqarfiit pillugu Inatsisartut inatsisissaat pillugu siunnersuummut nassuiaatini (UKA2022/125) atuarneqarsinnaapput:*

*'Imarpik qulaallugu timmisartuussinermut mittarfittaassat atulereerpata Mittarfeqarfiit isertitarisaraluani isertittarunnaarpagit, tapiissutissatut pisariaqartinneqartoq ukiumut 105 mio. koruuninut qaffanneqassaaq (ukiumi akit nalingat aalajangerneqassaaq). Nunap immikkoortortaanni tamani mittarfinnik kiisalu qulimiguulinnut mittarfinnik ingerlatsinermut, aserfallatsaaliinermut, aserfallatsaaliinermilu kinguaattoorutinut aningaasat tunngassuteqarput. Assersuutigalugu Dash-8 Q200-nik timmisartuussisarlu Kangerlussuaq nunap immikkoortortaani mittarfittut ingerlatiinnarneqarluni periarfissaasumi, tapiissutissatut pisariaqartinneqartuni aallaavigineqarpoq*

*Illersornissaqarfiup pisariaqartitai naammassiumallugit, inuinnarnillu timmisartuussinermut atorineqarsinnaatillugu Kangerlussuaq takinerusumik mittarfeqarluni ingerlatiinnarneqassasoq aalajangerneqassagualarpat, kiffartuussinissamik isumaqatigiissut ukiumut 158 mio. koruunit missaannik aningaasartaqassaaq. Kangerlussuarmik ingerlatsinermut aningaasartuutit ilai, kiffartuussinissamik isumaqatigiissuteqarnikkut Illersornissaqarfiup matussusertassagai naatsorsuutigineqarpoq, qanorli annertutigisumik akiliteqartassanersoq, massakkut isumaqatiginninniarnermi angusassat apeqqutaassapput.'*

*Nassuiaat: Imaprik qulaallugu inuinnarnik timmisartuussisarnermi Kangerlussuup mittarfittut ingerlaannarnissaani periarfissaasumi tapiissutissatut pisariaqartinneqartussat eqqarsaatigalugit illersornissaqarfiup Kangerlussuarmik atuiinnarnissaa pillugu illersornissaqarfimmut isumaqatiginninniarnermi angusassat apeqqutaassapput. Kiffartuussinissamik isumaqatigiissuteqarnikkut illersornissaqarfiup aningaasartuutit ilai matussusertassagai isumaqatigiissutigineqarpoq, qanorli annertutigisumik akiliteqartassanersoq, isumaqatiginninniarnermi angusassat apeqqutaassapput. (qupp. 26-28)"*

**Apeqquut 5: Danskit illersornissamut, allalluunniit avataaniit, aningaasaliinerat kangerlussuarmut 53mio amingaataasut matussusissagaluarunikkit, suliffeqarfiit suut paariinnarneqassappat ?**

Akissut: Erseqqissaatigissavara, Danmarkimi Naalakkersuisut isumaqatigiissuteqarfigitinnagit inaarutaasumik aningaasartuutissat Naalakkersuisut ilisimangimmatigit.

Naalakkersuisoqarfimma akissuteqarnissamini Mittarfeqarfiit A/S isummersoqatigisimavaa. Mittarfeqarfiit A/S-ip paasissutissiissutigaa, sulisoqarnissami pissutsit arlaqartut apeqqutaassasut, matumani mittarfiup takissusissaa, qanorlu atorneqartiginera ilanngullugu. Taassumap saniatigut Illersornissaqarfiup Kangerlussuarmi pisariaqartitai, suli isumaqatigiissuteqarfigineqanngitsut ilanngullugit. Taassumap saniatigut Naalakkersuisut aamma Danmarkip akornanni sinaakutissat pillugit isumaqatigiissut 2023-mi apriliip 24-aneersoq, Naalakkersuisut innersuussutigisinnaavaat.

**a. Ullumikkutullu takornarianik mittoqarsinnaassava Kangerlussuarmi?**

Akissut: Takornarissat siunissami Kangerlussuup mittarfianut aamma tikissinnaasassapput.

**Apeqquut 6: Kangerlussuaq aningaasalersorneqassappat ukioq tamaat ammanissaanut, sakkutuunut inuinnarnullu, taava qanoq sunniuteqassava inuiaqatigiinnut imminut akilersinnaasusaanut kisitsisinut tunngaviusunut Nuuk Ilulissallu mittarfissualiorneranut?**

Akissut: Tunngaviusunik naatsorsueqqinnerup, kingullermik 2021-mi nutarterneqartup § 37 naapertorlugu akissuteqaammut ilaatinneqarsinnaasut sinnersimavai, taamatullu maannarpiaq naatsorsueqqinnissamut ilisimaneqanngitsut amerlavallaarlutik. Tunngavissat ilisimaneqanngitsut siunissami inuinnaat atuinissaasa annertussusaannut, kikkut inuinnaat atuinerannik isumaginnittuunissaannut, kiisalu sakkutuut atuinissaat pillugu danskit naalagaaffiannut inaarutaasumik isumaqatigiissusiassamut tunngasuupput.

Taamaattumillu Inatsisartut Suleriaasiani § 37, imm. 2 naapertorlugu tamanna akissuteqarfigisinnaanngilara.

**Apeqquut 7: Naalakkersuisut massakkumut ukimut aningaasartuutigisassamaarneqartut Mittarfeqarfiit A/S, Kalaallit Airports International A/S aamma Kalaallit Airports Domestic A/S nunatta karsianut, namminersorlutik pigisaanut suliffeqarfinnut aammalu pisortanut allanut (soorlu kommunit) qassiuppat, qanorlu naatsorsuutinit allaanerutigaat pilersaarusionerqaqqaarneraniit, attartugasseeqqinnermiillu 900mio-inik?**

Akissut: Apeqquummut tassunga akissutissaq § 37 naapertorlugu akissuteqaammut ilaatinneqarsinnaasut sinnersimavai. Tamatumunnga tunngavissat arlallit, akissuteqaammut ilaatinneqartussat, immikkoortortaqarfiit toqqaannartumik


aningsartuuteqarfigisassa, kisiannili aamma toqqaannartumik  
toqqaannangitsumillu isertitaqarfigisassa sipaarfigisassaallu pissutaapput.

Taamaattumik Inatsisartut Suleriaasiani § 37, imm. 2 naapertorlugu tamanna  
akissuteqarfigisinnaangilara.

**Apequt 8: Naalackersuisut suut pilersaarutigivaat Kangerlussuup siunissaa  
pillugu?**

Akissut: Danmarkimi Naalackersuisut isumaqatiginninniarfiginerisa inernerat  
Naalackersuisut utaqqivaat. Illersornissaqarfiup siunissami Kangerlussuarmik atuinissaa  
pillugu Danmarkimi Naalackersuisut inaarutaasumik isumaqatigiissusiorfigineqareerpata  
aatsaat Naalackersuisut annerusumik saqqummiussisinnaassapput.

Inussiarnersumik inuulluaqqusillunga



Hans Peter Poulsen